

Inatsisartut Suleriaasissaannut siunnersuut
Inatsisartut Siulittaasoqarfiannit saqqummiunneqartoq

pillugu

Suleriaatsimut Ataatsimiititaliap

ISUMALIUTISSIISUTAA

Siunnersuutip aappassaaneernejarneranut saqqummiunneqartoq

Ataatsimiititaliaq suliarinninnermini ukuninnga ilaasortaqarpoq:

Inatsisartut Siulittaasuat Josef Motzfeldt IA, siulittaasoq
Inatsisartunut ilaasortaq Per Berthelsen, Siumut
Inatsisartunut ilaasortaq Olga P. Berthelsen, IA
Inatsisartunut ilaasortaq Finn Karlsen, Siumut
Inatsisartunut ilaasortaq Justus Hansen, Demokraatit
Inatsisartunut ilaasortaq Siverth K. Heilmann, Atassut
Inatsisartunut ilaasortaq Loritha Henriksen, Kattusseqatigiit Partiiat

Ataatsimiititaliap UKA2010-mi 13. oktober siullermeerinnittoqareermat siunnersuut misissuataarpaa.

Siunnersuutip imarisai siunertaalu

Siunnersuutikkut saqqummiunneqartukkut, Siulittaasoqarfimmilu 2010-mi upernaakkut aasakkullu sukumiisumik oqallisigineqarsimasumi, ukiuni kingullerni suleriaatsimik iluarsisarsimanernik suleriaatsimillu paasiuminaallisitsisimasunik isornartorsiutaasarsimasut isiginiarneqarsimapput, taamatullu aamma suleriaatsimik saqqummiussinnermut peqatigitillugu Inatsisartut Naalakkersuisullu pillugit inatsimmik nutaamik saqqumiussisoqarnerata malitsigisaanik inatsimmik allannqortitsinernut suleriaaseq naleqqussarneqarluni.

Inatsisartut Naalakkersuisullu pillugit inatsisikkut Inatsisartut inatsisiliortussaataasutut Naalakkersuisullu atuutsitsisussaataasutut immikkoornerat inatsisikkut paatsuugasaaangitsumik erseqqissarneqarpoq. Tamatuma malitsigisaanik aalajangersakkat arlallit inatsimmit suleriaatsimut nuunneqassapput, taamaalillunilu suleriaasissaq siusinnerusumut sanilliullugu Inatsisartuni pissutsit malittarisassaqaartinneqarnerannut najoqqutassatut annerusumik inissisimalissalluni.

Aningaasaqarnermut ataatsimiititaliamut Kukkunersuinernullu ataatsimiititaliamut ilaasortassanik upernaakkut ataatsimiinnermi toqqaasalernissaq tunngavissinneqarpoq, ilaasortat nikissagaluarpata ukiakkut ataatsimiinneq sioqqullugu misilittagaqareernissaat suleriaatsinillu sungiussereersimanissaat qularnaarniarlugu.

Namminersorneq pillugu inatsisip malitsigisaanittaaq suleriaatsip danskisuuani kalaallisut taaguutit atorneqartussangorlugit peqatigitillugu iluarsineqarput.

Naak suleriaaseq inatsisitut ilusilerlugu akuerineqartussaagaluartoq, ataatsimiititaliap allangortitsinerup malitsissaa tamanna kissaatiginartutut isigaa, taamaalillunimi siunissami Inatsisartut, ataatsimiititaliaat siulittaasoqarfiallu kisimik tassaalissammata suleriaatsip allangortinneqarnissaanik pilersaarusiortalersussat, taamaalilluni aamma inatsisilortussaataasut atuutisisussaatitaasullu avissartismaneqarnissaat erseqqissarneqarluni. Taamaaliornikkut siunissami Naalakkersuisut tusarniarneqartarnissaat mattunneqanngilaq. Taamaalilluni Siulittaasoqarfiup siunnersuuteqartutut kissaatigaa siunnersuutikkut saqqummiunneqartukkut Inatsisartuni sulineranut tunngavissamik sivisunerusumik atasussamik pilersitsisoqassasoq.

Inatsisartut siunnersuummik siullermeerinninnerat

Ataatsimiititaliamut ilaasortat iluarisimaarlugu maluginiarpaat siunnersuutip siullermeerneqarnerani partiit tamarmik siunnersuut taamatut isikkoqartillugu apeqqusernagu ilalermassuk.

Siumumiilli oqaatigineqarpoq sullugineqatsiarmat siunnersuutikkut eqeersimaarnerusumik oqallinnissamut periarfissaqarnerunissaq siunertaralugu partiit sukumiinerusumik oqaaseqarsinnaanerminnut periarfissinniarneqanngimmata, naak partii isumaqaraluartoq siunnersuutikkut kissaatimi ilarparujussui naammassineqarsimasut.

Tusarniaanermi akissutit

Missingiut saqqummiunneqartoq partiinut Naalakkersuisunullu tusarniaatigineqarsimavoq.

Siunnersuummut nassiunneqartumut partiit arlaalluunniit tusarniaanermi akissuteqarsimanngillat, taamaattumillu siunnersuut saqqummiunneqartoq inatsisilerinnermi teknikikkut iluarssiisutit eqqaassanngikkaanni tusarniaassutigineqartumit allaanerunani.

Ataatsimiititaliap siunnersuummik suliarinninnera

Ataatsimiititaliap iluarisimaarlugu paasivaa siunnersuutikkut periarfissaqarmat Inatsisartut imaaliallaannaq Inatsisartut ataatsimiititaliaannik pilersitsillutillu atorunnaarsitsisinnaanerat.

Ataatsimiititaliap isumaliutigisimavaa qanoq annertutigisumik inatsisartuni oqallinnerni apeqquteqarsinnaanermut akissuteqarsinnaanermullu periarfissat siunnersuutigineqartumut sanilliullugu annertusineqarsinnaanersut. Tamatumunnga atatillugu isumaliutinut ilaasimavoq missingiummi piffissat oqaaseqarfusinnaasut pillugit ilanngussami allangortitsisoqartariaqarnerasoq.

Tamatumunnga atatillugu akunneq apeqquteqarfusartoq eqqarsaatigalugu malittarisassat

allanngortinneqarsinnaaneranut ataatsimiititaliap eqqartorjaa. Ataatsimiititaliap malittarisassat pioreersut, allanngortinnagit ingerlatiinnarneqarnissaat siunnersuutigineqartut, sukumiinerusumik oqallisigereerlugit inerniliuppaa akunnerinut apeqquteqarfiusartut sivitsornissaannut (akunnerit ullullu eqqarsaatigalugit) aporfissaqanngitsoq. Taamatuttaaq aporfissaqarsorinangilaq ataatsikkut Naalakkersuisunut ilaasortanut amerlanernut ikinnerusunulluunniit apeqquteqartarnissamut periarfissiisoqarpat.

Taamatuttaaq ataatsimiititaliap erseqqissarpaa aporfissaqartinnginnamiuk ataatsimiinnerup ingerlanerani akunnerup apeqquteqarfiusinnaasup aalajangersimasunik pisoqartillugu anner-tusineqarsinnaanera, tassa pissutsinik saqqummersoqariataartillugu nalinginnaasumik kikkunnunniit tamanut soqutiginaatilinnik pissutissaqalersitsisinnaasunillu Naalakkersuisunut ilaasortamik ilaasortanilluunniit annertusisamik itinerusumillu apeqqarissaarnissamut.

Ataatsimiititaliaq taamatuttaaq isumaqarpoq suliassap tamanna pisariaqartikkaangagu suleriaatsimut ilanngussami piffissat oqaaseqarfiusinnaasut sanioqqunneqarnissaannut periarfissiissutikkut tunngavissaqartoq piffissanut oqaaseqarfiusinnaasunut isornartorsiunerit ilaasa naaperiarnissaannut.

Suleriaatsimut Ataatsimiititaliap inassutigaa

Ataatsimiititaliami amerlanerussuteqartut Inuit Ataqatigiit, Demokraatit, Atassutip Kattusseqatigiillu Partiiata sinniisaasa suleriaasissatut siunnersuutip akuerineqarnissaa **inassutigaaat.**

Ataatsimiititaliami ikinnerussuteqartoq Siumup sinniisaa **ikinnerussuteqarluni ima oqaaseqaateqarpoq:**


Siumup aalajangiusimavaa Inatsisartunut ilaasortat Inatsisartut oqaluttarfianniit oqaluttumut apeqquteqarsinnaanerit tallimaasariaqartut.

Periarfissaq maannamut atuuttoq isumaqarfigineqarpoq Partiit Inatsisartuni ilaasortaasut periarfissinneqarneq ajortut apeqquteqarsinnaanerminnut isummersorsinnaanerminnullu tamannalu tamat oqartussaqaataanerannut naalakkersueqataanerannullu annertuumik killiliisutut isumaqarfigineqarluni.

Killeqarnerata kingunerisarpaa allatut ajornartumik Inatsisartut suleriusaata § 36 imm 1 naapertorlugu annertuumik atuisoqartariaqarnera tamannalumi kingullertigut Naalakkersuisoqarfinnit isornartutut isigineqarpoq.

Taamaattumik Siumup aaliangiusimavaa tallimariarluni apeqquteqartarsinnaaneq.


Ataatsimiititaliap taamatut oqaaseqarluni siunnersuut aappassaaniigassanngortippaa.



Josef Motzfeldt, Siulittaasoq




Per Berthelsen



Olga P. Berthelsen



Finn Karlsen



Justus Hansen



Siverth K. Heilmann



Loritha Henriksen